

# Utusan SAWIT

MPOB Menjana Perubahan Industri Sawit



**Utusan Borneo**  
Citra Generasi Pribadi  
**JUMAAT**  
23 FEBRUARI 2018

EDISI KHAS

## TPM selar diskriminasi sawit

Oleh Fadzil Ghazali  
afadzilg@mpob.gov.my

**BAGANDATUK:** Timbalan Perdana Menteri Datuk Seri Dr Ahmad Zahid Hamidi mengancam negara yang berselindung di sebalik alasan kemampuan untuk mengambil tindakan memboikot minyak sawit Malaysia.

Beliau berkata, negara terbabit pandai melakukan pelbagai usaha pemasaran supaya Malaysia membeli barangan mereka, tetapi pada masa sama enggan membeli barangan dari negara ini.

“Bagaimanapun, Malaysia bukan negara yang boleh diperkotak-katikkan,” katanya ketika berucap merasmikan Program Hello Komoditi Bagan Datuk di Dewan Dato’ Mohamed Jamrah, Sungai Sumun dekat sini baru-baru ini. Turut hadir, Menteri

Perusahaan Perladangan dan Komoditi, Datuk Seri Mah Siew Keong; Ketua Setiausaha Kementerian Perusahaan Perladangan dan Komoditi (MPIC), Datuk K. Yogeeswaran; Pengerusi Lembaga Minyak Sawit Malaysia (MPOB), Datuk Seri Ahmad Hamzah; Ketua Pengarah MPOB, Datuk Dr Ahmad Kushairi Din; Ahli Dewan Undangan Negeri (ADUN) Rungku yang juga Pengerusi Jawatankuasa Sumber Manusia, Belia dan Sukan negeri, Datuk Shahrul Zaman Yahya dan Pegawai Daerah Bagan Datuk, Datuk Hamzah Husin.

Datuk Seri Dr Ahmad Zahid Hamidi berkata demikian ketika mengulas tindakan Kesatuan Eropah (EU) yang kini dalam proses untuk memberhentikan penggunaan bio bahan api di EU menjelang tahun 2021.



**DATUK** Seri Dr Ahmad Zahid Hamidi ketika merasmikan Hello Komoditi Bagan Datuk.

EU juga sedang dalam usaha merangka undang-undang untuk mengimport hanya minyak sawit yang mempunyai

penjualan mampan. Beliau berkata, tindakan negara sedemikian pastinya akan memberi kesan dan

menjejaskan pendapatan lebih 500,000 pekebun sawit di seluruh negara jika ia diteruskan.

“Mesyuarat Kabinet minggu lalu yang dipengerusikan Perdana Menteri, Datuk Seri Najib Razak, memutuskan kerajaan akan mengkaji semula pembelian barangan dari mana-mana negara yang memboikot penggunaan sawit,” katanya.

“Untuk tempoh Januari hingga November 2017, eksport produk berasaskan komoditi berjumlah RM129.1 bilion atau 15.1 peratus daripada keseluruhan pendapatan eksport negara. Daripada jumlah itu, sejumlah 55.4 peratus atau RM71.5 bilion disumbangkan sektor sawit,” katanya.

Datuk Seri Dr Ahmad Zahid Hamidi berkata, sektor komoditi adalah tulang belakang utama yang mana ia bukan saja menyumbang dalam meningkatkan pendapatan negara, bahkan turut menjadi antara kegiatan ekonomi rakyat.

“Sehubungan itu, kerajaan akan mengambil langkah sewajarnya bagi memastikan masa depan sektor minyak sawit negara terpelihara,” katanya.

Selepas menyampaikan ucapan perasmian beliau, Datuk Seri Di Raja Dr Ahmad Zahid Hamidi turut melawat tapak pameran Program Hello Komoditi Bagan Datuk yang disediakan oleh agensi MPIC seperti MPOB, Lembaga Koko Malaysia, Lembaga Getah Malaysia dan Lembaga Perindustrian Kayu Malaysia.

Program Hello Komoditi anjuran MPIC sebagai usaha untuk meningkatkan kesedaran awam terhadap sektor komoditi negara dan menghebahkan kepada pihak berkepentingan mengenai perkembangan industri serta bantuan yang diberikan oleh kerajaan untuk pengusaha industri komoditi negara.



**DATUK** Seri Mah Siew Keong bersama warga kerja MPIC.

## Sasar 2 juta hektar tanaman sawit mampan pensijilan MSPO, 2018

Oleh Noor Asmawati Abdul Samad  
watie@mpob.gov.my

**PUTRAJAYA:** Menteri Perusahaan Perladangan dan Komoditi, Datuk Seri Mah Siew Keong menasaskan kawasan tanaman sawit seluas 2 juta hektar akan mempunyai pensijilan Minyak Sawit Mampan Malaysia (MSPO) menjelang akhir tahun 2018.

Katanya, pensijilan MSPO adalah salah satu strategi menangani isu getir yang diwujudkan oleh Parlimen Kesatuan Eropah (EU) dengan meluluskan resolusi mengaitkan pembangunan industri sawit dengan kemusnahan alam sekitar dan habitat hidupan liar.

“Dalam hal ini, MSPO merupakan salah satu strategi untuk menangani isu berkenaan di samping menjadi asas bagi penjenamaan minyak sawit Malaysia.

Katanya, sepanjang tahun

2017, seluas hampir 520,000 hektar tanaman sawit dan 50 kilang memproses sawit telah mendapat pensijilan MSPO, berbanding hanya lebih kurang 220,000 hektar dan 21 kilang memproses sawit pada tahun 2016.

“Justeru, untuk tahun 2018, kementerian menasaskan jumlah keluasan tanaman dengan pensijilan MSPO akan bertambah kepada 2 juta hektar,” katanya berucap di Majlis Perhimpunan Kementerian Perusahaan Perladangan dan Komoditi (MPIC) 2018 di sini, baru-baru ini.

Katanya, pelaksanaan skim ini adalah mandatori menjelang 31 Disember 2019 dan dijangka mampu memperkukuhkan pegangan pasaran sedia ada di negara-negara EU, China dan India serta menembusi pasaran baharu yang berpotensi untuk mencapai sasaran eksport sawit berjumlah RM83 bilion pada 2020.

Sebelumnya, beliau berkata,

tahun 2017 penuh bermakna buat industri sawit kerana menyambut ulang tahun ke-100 kecemerlangan sawit negara.

Katanya, industri sawit sebagai penyumbang terbesar pendapatan eksport negara melalui sektor komoditi.

“Sepanjang Januari sehingga November 2017, sektor sawit telah menyumbang RM71.5 bilion, peningkatan 16 peratus berbanding tempoh yang sama pada tahun 2016.

Katanya, sektor komoditi masih kekal sebagai tulang belulang ekonomi negara dan menjadi antara penyumbang eksport terbesar bagi tahun 2017.

Bagi tempoh Januari hingga November 2017, jumlah pendapatan eksport yang direkodkan adalah sebanyak RM129.1 bilion atau 15.1 peratus daripada keseluruhan pendapatan eksport negara.

Nilai ini adalah peningkatan sebanyak 16.5 peratus berbanding RM110.8 bilion

yang direkodkan pada Januari hingga November 2016.

Jumlah pendapatan eksport ini telah melebihi sasaran MPIC untuk tahun 2017 iaitu sebanyak RM128 bilion dan juga melebihi jumlah keseluruhan pendapatan eksport bagi 2016 iaitu sebanyak RM122.6 bilion.

Datuk Seri Mah Siew Keong berkata, industri komoditi akan terus relevan dan menjadi khazanah negara yang paling bernilai bukan saja pada hari ini tetapi pada masa depan.

Beliau menyeru semua pihak terutama seluruh warga MPIC untuk melipat gandakan usaha demi kepentingan lebih 1.2 juta pekebun kecil komoditi serta sektor komoditi secara keseluruhannya.

Majlis berkenaan turut dihadiri Timbalannya, Datuk Datu Nasrun Datu Mansur, Ketua Setiausaha MPIC, Datuk K. Yogeeswaran dan Ketua-Ketua Pengarah Agensi dan Ketua Pegawai Eksekutif Majlis di bawah MPIC.

## Pekebun kecil raih manfaat koperasi sawit

Oleh Muhammad Asyraf Hussin & Noor Asmawati Abdul samad  
asyrafhussin@mpob.gov.my & watie@mpob.gov.my

**TUNGKU:** Pekebun kecil sawit sekitar daerah ini meraih manfaat hasil penubuhan Koperasi Penanam Sawit Mampan (KPSM) Daerah Tungku Berhad sejak tahun 2014.

KPSM berkenaan yang memulakan operasi jualan buah tandan segar (BTS) sejak akhir tahun 2015 kini disertai oleh lebih 100 pekebun kecil sekitar daerah ini.

Timbalan Menteri Perusahaan Perladangan dan Komoditi, Datuk Datu Nasrun Datu Mansur ketika berucap merasmikan Pusat Timbang KPSM Daerah Tungku Berhad, berkata penubuhan KPSM adalah langkah strategik bagi menjamin penglibatan pekebun kecil sawit dalam model ekonomi baharu.

“Penglibatan pekebun kecil dalam aktiviti koperasi dan industri kecil dan sederhana dijangka akan memperkukuhkan sumber pendapatan.

Katanya, KPSM yang telah menjalankan urus niaga BTS berkelompok dan pembelian input secara pukal memberi kesan langsung dalam peningkatan pendapatan ahli koperasi.

“Kerajaan menyediakan peruntukan sebanyak RM1.12 juta untuk disalurkan kepada



**DATUK** Datu Nasrun Datu Mansur menyampaikan kupon bantuan integrasi ternakan kepada pekebun kecil sawit.

pekebun kecil bagi penubuhan koperasi. Dibawah Rancangan Malaysia ke-11, kerajaan juga memperuntukkan dana sebanyak RM200,000 yang disalurkan melalui Lembaga Minyak Sawit Malaysia (MPOB) bagi pembinaan pusat timbang BTS yang dikendalikan oleh KPSM.

Sehingga akhir tahun 2017, sebanyak 43 buah KPSM telah ditubuhkan diseluruh Malaysia iaitu 17 di Semenanjung, 11 di Sabah dan 15 di Sarawak.

Daripada jumlah tersebut, 25 KPSM di seluruh negara telah memulakan jualan kelompok buah tandan segar secara terus ke kilang dengan jumlah BTS sebanyak 102,612 tan.

“KPSM yang menjalankan jualan terus ke kilang memberi peningkatan pendapatan kepada pekebun kecil sebanyak 15 peratus lebih tinggi berbanding jualan kepada peraih.

Pada majlis itu, Datu Nasrun turut menyampaikan bantuan tanam baru sawit dan bantuan integrasi ternakan kepada pekebun kecil.

Yang turut hadir pada majlis berkenaan ialah Timbalan Ketua Pengarah (Penyelidikan dan Pembangunan) MPOB, Dr. Ahmad Parwez Ghulam Kadir dan Pengerusi KPSM Tungku Berhad, Datuk Mohd Basari Abdul Gapar.



**DATUK** Datu Nasrun ketika berucap merasmikan Projek Jalan Ladang Daerah Tungku, Lahad Datu, Sabah.

## Projek jalan ladang kebun terus dilaksana

Oleh Muhammad Asyraf Hussin & Noor Asmawati Abdul Samad  
asyrafhussin@mpob.gov.my & watie@mpob.gov.my

**TUNGKU:** Dalam usaha memajukan sosioekonomi kawasan luar bandar, kerajaan melalui pelaksanaan projek pembangunan menyediakan kemudahan infrastruktur asas yang memberi manfaat kepada penduduk.

Timbalan Menteri Perusahaan Perladangan dan Komoditi, Datuk Datu Nasrun Datu Mansur ketika berucap merasmikan Projek Jalan Ladang Pekebun Kecil Daerah Tungku, Lahad Datu berkata, projek berkenaan adalah antara inisiatif kerajaan dalam usaha membangunkan kawasan luar bandar melalui penyediaan kemudahan

asas untuk kegunaan pekebun kecil dan penduduk setempat.

Katanya, pembinaan jalan ladang yang menghubungkan kawasan kebun memberi kemudahan kepada penduduk bagi menjalankan aktiviti pertanian termasuk penanaman sawit yang memberi peningkatan pendapatan dan kualiti hidup masyarakat luar bandar.

“Pelaksanaan projek jalan ladang pekebun kecil melibatkan penyelarasan di bawah dua kementerian iaitu Kementerian Kemajuan Luar Bandar dan Wilayah (KKLW) dan Kementerian Perusahaan Perladangan dan Komoditi (MPIC) untuk manfaat penduduk luar bandar.

“Projek pembinaan jalan ladang pekebun kecil melibatkan pembinaan jalan baharu dan naik taraf jalan sedia

ada serta pembinaan pembentungan, jambatan dan kerja-kerja berkaitan bagi meningkatkan laluan yang menghubungkan jalan utama dengan jalan ladang yang tidak terselia.

Katanya, pada tahun 2017, sebanyak 103 projek jalan ladang pekebun kecil telah diluluskan pelaksanaannya melibatkan anggaran kos sebanyak RM15.3 juta dengan jarak sepanjang 165.67 kilometer.

“Daripada jumlah itu, 26 projek dilaksanakan di Sabah dengan anggaran kos sebanyak RM6.3 juta atau 41 peratus daripada kos keseluruhan.

Katanya, bagi daerah Tungku, lapan projek jalan ladang pekebun kecil membabitkan jarak sepanjang 11.02 kilometer diluluskan. Lima projek telah siap sepenuhnya melibatkan jarak 6.02

kilometer, manakala tiga lagi projek masih dalam tempoh pelaksanaan.

“Saya yakin pelaksanaan projek ini memberi manfaat kepada penduduk setempat dan pekebun kecil di daerah Tungku bagi kemudahan pengangkutan hasil pertanian termasuk buah sawit.

“Penyediaan kemudahan infrastruktur secara tidak langsung menyumbang peningkatan produktiviti dan kualiti buah sawit dengan kemudahan bekalan input pertanian dan kecekapan penghantaran buah sawit dari kebun ke pusat pengumpulan,” katanya.

Penglibatan pekebun kecil dalam mengusahakan tanaman sawit memberi manfaat dalam meningkatkan pendapatan dan taraf sosioekonomi serta menyumbang kepada kesejahteraan ekonomi negara.

# Hari hitam dagangan bebas, adil



**DATUK Sri Mah Siew Keong** semasa berucap merasmikan R&O Seminar 2018 di Putrajaya.

**Oleh Fadzil Ghazali**  
afadzilg@mpob.gov.my

**PUTRAJAYA:** Menteri Perusahaan Perladangan dan Komoditi Datuk Seri Mah Siew Keong menyifatkan tindakan Kesatuan Eropah (EU) ke atas minyak sawit sebagai amalan apartheid tanaman dan menjadi hari hitam untuk dunia dagangan bebas dan adil.

Tahun lalu, Parlimen EU telah meluluskan dua resolusi iaitu mengenakan penjiwaan kemampuan untuk semua eksport sawit ke EU menjelang 2020 dan mengharuskan penggunaan minyak sawit dalam program bio bahan api EU mulai tahun 2021.

"Ini bukan persoalan kemampuan tetapi lebih kepada tindakan diskriminasi terhadap minyak sawit. Bagaimana mereka boleh menghalang minyak sawit untuk segalanya?"

"Ini juga bukan isu

kemusnahan hutan tetapi lebih kepada polisi perlindungan untuk peladang minyak bijian Eropah," katanya selepas merasmikan Palm Oil Economic Review and Outlook (R&O) Seminar 2018 anjuran Lembaga Minyak Sawit Malaysia (MPOB), di sini baru-baru ini.

Majlis perasmian R&O Seminar 2018 turut dihadiri Ketua Setiausaha Kementerian Perusahaan Perladangan dan Komoditi (MPIC), Datuk K. Yogeeswaran dan Ketua Pengarah MPOB, Datuk Dr. Ahmad Kushairi Din.

R&O Seminar adalah program tahunan anjuran MPOB sebagai usaha menyampaikan maklumat terkini mengenai industri sawit serta industri minyak dan lelemak global kepada pihak berkepentingan.

Datuk Seri Mah Siew Keong berkata, layanan adil sepatutnya diberi kepada

semua minyak sayuran yang digunakan dalam adunan bio bahan api seperti minyak sawit dan kacang soya, tetapi EU sememangnya sentiasa ada isu dengan minyak sawit.

Beliau berkata, walaupun perkembangan nimerupakan satu tamarpan kepada industri sawit namun ada juga tanda-tanda positif daripada kemul isu sawit di EU.

Katanya, jumlah mereka yang mengundi bersetuju dengan tindakan ke atas minyak sawit ini telah menurun kepada 429 Ahli Parlimen EU (MEPs) berbanding dengan 640 MEPs semasa pengundian asal dibuat pada April 2017.

"Oleh itu Malaysia akan terus meningkatkan usaha untuk menjelaskan kepada Menteri dan Suruhanjaya Eropah mengenai kepentingan industri sawit kepada dunia sebelum EU mengambil keputusan untuk

mengharamkan penggunaan minyak sawit dalam program biobahan api EU," tambah beliau.

Sebelum tindakan EU ke atas minyak sawit ini menjadi undang-undang, ianya perlu mendapat mandat daripada Majlis Menteri EU serta Suruhanjaya Eropah.

"Kita akan menjelaskan kepada mereka melalui kedutaan kita di 16 negara EU. Kita juga akan bertemu dengan wakil EU di pejabat kedutaan mereka di Malaysia untuk memastikan kesemua fakta dan maklumat yang betul mengenai sawit disebarkan. Kita juga akan menekankan bahawa kita diketahuhi oleh EU," tambah Mah.

Jumlah permintaan EU untuk biodiesel berasaskan minyak sawit mencecah 2.8 juta tan setahun dan Malaysia menyumbang sebanyak 800,000 tan sementara Indonesia pula sejumlah 2 juta tan.

## Kerjasama strategi lautan biru MPOB, MOMG sektor oleokimia

**Oleh Razmah Ghazali**  
razmah@mpob.gov.my

**BANGI:** Lembaga Minyak Sawit Malaysia (MPOB) dan Kumpulan Pengeluar Oleokimia Malaysia (MOMG) memberi tumpuan pada penyelidikan dan isu teknikal industri oleokimia semasa sesi interaksi yang diadakan di ibu pejabat MPOB, di sini.

Ahli Exco MOMG yang diketuai Pengerusinya, Suresh Gunaratnam hadir ke interaksi yang dipengerusikan oleh Pengerusi MPOB, Datuk Seri Ahmad Hamzah dan disertai Ketua Pengarah MPOB, Datuk Dr. Ahmad Kushairi Din serta pegawai kanan MPOB.

Perbincangan antara MPOB, MOMG bertumpu kepada isu berkaitan penyelidikan, isu teknikal dan industri oleokimia sawit dalam negara.

Kerjasama lautan biru kebangsaan (NBOS) antara kedua-dua pihak meningkatkan hubungan dua hala, bertukar maklumat dan pandangan mengenai industri oleokimia

serta projek usahasama di antara MPOB dan MOMG demi kesejahteraan industri sawit negara.

Datuk Seri Ahmad Hamzah ketika berucap mengalu-alukan kehadiran wakil MOMG berkata, perkongsian maklumat terkini berkaitan pelbagai isu industri oleokimia melalui interaksi seumpama ini diharapkan dapat meningkatkan kualiti penyelidikan dan pembangunan (R&D) dalam sektor berkenaan.

Katanya, tindakan susulan dapat dirangka dan dilaksanakan bagi menangani masalah berkaitan sekali gus akan dapat menyumbang kepada peningkatan pendapatan industri sawit.

"Industri oleokimia diakui telah menyumbang pendapatan tambahan kepada negara disamping minyak sawit. Malaysia menyumbang hampir 20 peratus kapasiti oleokimia dunia iaitu 2.67 juta tan pada 2017. Eksport produk oleokimia kini mencecah 2.74 juta tan dengan nilai hampir



**DATUK Seri Ahmad Hamzah** (empat dari kanan) bersama **Datuk Dr Ahmad Kushairi Din** (lima dari kanan) bergambar dengan **Pengerusi MOMG, Suresh Gunaratnam** (tiga dari kanan) dan ahli Exco MOMG.

RM20 bilion.

Beliau turut menyentuh berkenaan dana Projek Permulan (EPPP) di bawah Bidang Ekonomi Utama Negara (NKEA) Sawit dan Getah yang disediakan oleh kerajaan bagi membantu industri oleokimia

tempat memberi lebih tumpuan kepada penghasilan terbitan oleokimia bernilai tambah tinggi.

Katanya, industri oleokimia perlu peka kepada perkembangan regulasi di negara-negara luar,

terutamanya Eropah, yang boleh memberi impak kepada eksport oleokimia negara.

Beliau turut mengumumkan kemudahan makmal ujian ekotoksikologi di MPOB yang telah mendapat pensijilan OECD Good Laboratory

Practice (GLP) (Amalan Baik Makmal) yang dapat membantu industri mendaftarkan produk baru di Eropah.

Beberapa isu berkaitan projek kolaborasi di antara MPOB dan MOMG, isu teknikal mengenai aktiviti hiliran dan cabaran yang

dihadapi oleh industri oleokimia turut dibincangkan.

Antaranya, kajian kitaran hidup (life cycle assessment, LCA) asid lemak dan giserol, serta analisis kandungan racun makhluk persekitaran dan kandungan 3-MCPD (3-monochloropropane-1,2-diol) dan ester glisidil (GE) dalam produk oleokimia.

Selain projek kolaborasi, MOMG juga menyuarakan beberapa isu umum termasuk menambahbaik spesifikasi Persatuan Penapis Minyak Sawit Malaysia (Palm Oil Refiners Association of Malaysia - PORAM) bagi stearin, cukai ke atas minyak sawit yang akan dimaikkah oleh negara Eropah, serta keperluan untuk meningkatkan bekalan minyak sirung sawit dalam negara.

MOMG berharap melalui kerjasama erat dengan MPOB, produk oleokimia Malaysia akan mempunyai kelebihan daya saing terutama pada segi kualiti sekali gus meningkatkan pasaran di peringkat global.

## Prestasi cemerlang industri sawit 2017, prospek 2018

**Oleh Fadzil Ghazali & Dayang Nazriza Shahari**  
afadzilg@mpob.gov.my & dayang@mpob.gov.my

**PUTRAJAYA:** Industri sawit negara dijangka akan terus menyerlah pada tahun 2018 berikutan prestasi baik dari segi pengeluaran dan jumlah serta nilai eksport.

Ketua Pengarah MPOB, Datuk Dr Ahmad Kushairi Din berkata pengeluaran minyak sawit mentah (MSM) dijangka meningkat 2.9 peratus kepada 20.50 juta tan berbanding 19.92 juta tan pada tahun 2017.


Eksport minyak sawit pula dijangka naik 5.1 peratus kepada 17.40 juta tan dan pendapatan melalui eksport ini akan meningkat 2.6 peratus kepada RM80 bilion.

Stok minyak sawit yang berada pada tahap 2.73 juta tan pada hujung Disember, 2017 dijangka turun 15.8 peratus kepada 2.30 juta tan pada tahun ini, kata Dr Kushairi semasa membentangkan kertas kerja beliau di Palm Oil Economic Review and Outlook (R&O) Seminar 2018, di sini baru-baru ini.

R&O Seminar adalah program tahunan anjuran MPOB untuk menyebarkan maklumat terkini mengenai industri sawit serta industri minyak dan lelemak global kepada pihak berkepentingan.

Mengenai harga MSM untuk 2018 pula, Dr Kushairi berkata faktor-faktor mempengaruhi harga komoditi ini termasuk tahap pengeluaran minyak sawit, kadar matawang Ringgit berbanding Dolar US dan potensi penurunan harga minyak soya dan minyak sesawi.

Tahun 2017 telah menyaksikan harga MSM didagangkan pada tahap tertinggi iaitu RM3,268 satu



**DATUK Dr Ahmad Kushairi Din** ketika membentangkan kertas kerjanya pada R&O Seminar 2018 di Putrajaya.

tan pada bulan Januari dan di aras terendah pada RM2,407 satu tan pada Disember lalu.

Harga purata tahunan MSM meningkat kepada RM2,783 satu tan untuk tahun 2017 berbanding RM2,653 satu tan pada tahun 2016 berikutan kenaikan harga minyak kacang soya, minyak mentah Brent dan eksport minyak sawit.

Dari segi kelulusan tanaman sawit pada tahun 2017, dari jumlah keseluruhan kawasan tanaman 5.81 juta hektar, sebanyak 5.11 juta hektar (88 peratus) adalah di peringkat matang sementara 0.70 juta hektar (12 peratus) masih belum matang. Hasil buah tandan segar (BTS) meningkat 12.4 peratus kepada 17.89 tan sehektar pada tahun 2017 berbanding 15.91 tan sehektar pada 2016.

Terdapat sejumlah 454 kilang minyak sawit beroperasi pada tahun 2017 dengan kapasiti memproses 112.19 juta tan setahun. Namun kadar perahan minyak (OER) menurun 2.3 peratus kepada 19.72 peratus pada tahun 2017 berbanding

20.18 peratus pada tahun sebelumnya.

Kuantiti eksport minyak sawit telah meningkat sebanyak 3.2 peratus kepada 16.56 juta tan pada 2017 berbanding 16.05 juta tan yang dieksport pada 2016 berikutan permintaan yang tinggi, terutamanya dari Arab Saudi, Iran, Pakistan dan Filipina.

India masih mengekalkan kedudukannya sebagai pasaran eksport minyak sawit Malaysia terbesar buat kali keempat berturut-turut sejak tahun 2014 dengan jumlah eksport sebanyak 2.02 juta tan atau 12.2 peratus daripada jumlah keseluruhan eksport minyak sawit pada 2017.

Tahun 2017 turut menyaksikan stok akhir berada pada paras yang lebih tinggi iaitu 2.73 juta tan, meningkat 63.9 peratus berbanding 1.67 juta tan pada Disember 2016. Ini disebabkan oleh peningkatan pengeluaran MSM sebanyak 15.0 peratus atau 2.60 juta tan dan import minyak sawit sebanyak 33.9 peratus atau 140,681 tan.

## KURSUS OPERASI MEKANISASI LADANG (KOML) SESI APRIL 2018

### KURSUS OPERASI MEKANISASI LADANG (KOML)

- PLASMA telah telah diiktiraf sebagai Pusat Bertauliah oleh Jabatan Pembangunan Kemahiran (JPK) bagi menjalankan Kursus Operasi Mekanisasi Sawit Tahap 2, 3 dan 4.
- Berjuaan untuk melahirkan generasi baru yang berkemahiran tinggi dalam bidang mekanisasi ladang selaras dengan hasrat kerajaan untuk memantapkan modal insan Negara.

### OBJEKTIF

- Memberi pendedahan kepada pelatih dari segi teori serta penekanan yang lebih kepada aspek praktikal berkenaan mekanisasi di ladang sawit.
- Bermatlamat untuk melahirkan warga kerja yang cekap dan terlatih.

### SYARAT KEMASUKAN

- Warganegara Malaysia
- Berumur 17 hingga 55 tahun
- Tamat SPM/SPMV atau setaraf dengannya atau mempunyai pengalaman bekerja di sektor perladangan / penjenteraan ladang sawit.



### YURAN

- RM3500. Kemudahan bantuan kewangan boleh diruskan bagi mereka yang layak

### JANGKA MASA KURSUS

- Tahap 2: 6 Bulan
- Tahap 3: 12 Bulan
- Tahap 4: 18 Bulan (PENGAMBILAN SETIAP APRIL DAN OKTOBER)

### LOKASI

KM 137, Lebuhraya Segamat, Kuantan  
Peti Surat No. 24, Pejabat Pas Bandar Tun Razak,  
26900 Bandar Muadzam Shah, Pahang

### CARA MEMOHON

- Pemohon hendaklah menggunakan borang yang dilampirkan atau borang yang dimuat turun dari laman web MPOB ([www.mpob.gov.my](http://www.mpob.gov.my)) atau laman web IMPAC ([www.impac.edu.my](http://www.impac.edu.my))
- Berterangkan bersama satu salinan kad pengenalan pemohon, salinan sijil SPM/SPMV/SPM/SPMV atau yang telah disahkan atau surat pengesahan majikan bagi mereka yang berkenaan
- Terikh Akhir Permohonan Bagi Sesi April 2018: 02 Mac 2018



**MAKLUMAT LANJUT DAN PERTANYAAN, SILA HUBUNGI:**  
MCHD SCLAH DERAMAN [sclah@mpob.gov.my](mailto:sclah@mpob.gov.my)  
SM BALQES JAFFAR [balqes@mpob.gov.my](mailto:balqes@mpob.gov.my)  
Tel: 09-451 4400 faks: 4402/4401 Faks: 09-451 4405